

## REGLUR

### um diplomanám á meistarastigi við hjúkrunarfræðideild Háskóla Íslands.

#### 1. gr.

##### *Markmið diplománáms á meistarastigi.*

Hjúkrunarfræðideild veitir menntun til diplománáms á meistarastigi á þeim sviðum þar sem aðstaða og sérþekking er fyrir hendi.

Markmið diplománámsins er að gefa hjúkrunarfræðingum á Íslandi kost á að auka færni sína og þekkingu á ýmsum fræða- og starfssviðum hjúkrunar og stuðla að því að þeir beiti gagnrýnni hugsun, sýni sérhæfða færni og forystu á hinum fjölbreytilegu sviðum hjúkrunar.

#### 2. gr.

##### *Umsóknarfrestur.*

Umsóknarfrestur er að jafnaði til 15. mars fyrir innritun á haustmisseri. Deildarstjórn er heimilt að leyfa einnig innritun á öðrum tímum að undangenginni auglýsingu.

#### 3. gr.

##### *Meðferð umsókna.*

Umsóknum skal skilað til skrifstofu hjúkrunarfræðideildar á þar til gerðum eyðublöðum. Rannsóknanámsnefnd afgreiðir umsóknirnar og tilkynnir deildarráði um niðurstöðurnar. Afgreiðslu umsókna sem berast fyrir 15. mars (vegna innritunar á haustmisseri) skal að jafnaði vera lokið og þeim svarað fyrir 25. apríl. Afgreiðslu umsókna sem berast á öðrum tíma skal að jafnaði svarað innan 40 daga frá því að auglýstum umsóknarfresti lýkur.

Ferli umsókna er sem hér segir:

- a) Stúdent sækir um inngöngu í diplomanám á sérstöku eyðublaði sem fæst á heimasíðu hjúkrunarfræðideildar og á skrifstofu deildarinnar og er eyðublaðinu skilað þangað undirrituðu.
- b) Rannsóknanámsnefnd samþykkir umsóknina eða synjar og tilkynnir deildarráði um niðurstöðu. Deildarráð tilkynnir umsækjanda síðan bréflaga um niðurstöðu rannsóknanámsnefndar.
- c) Hjúkrunarfræðideild er heimilt, með samþykki háskólaráðs, að takmarka þann fjölda sem tekinn er inn í námið og fara þar m.a. eftir gæðum umsókna og tilgreindum auglýstum skilyrðum um forgang að auglýstu námi. Takmörkun í inntöku byggir á aðgangi að sérfræðiaðstöðu til náms á viðkomandi sérsviði.
- d) Afgreiðsla umsóknar í hjúkrunarfræðideild er tilkynnt til nemendaskrár um leið og hún liggur fyrir.
- e) Stúdent sem rannsóknanámsnefnd hefur samþykkt í diplomanám skal snúa sér til nemendaskrár og ganga frá skráningu sinni í námið eigi síðar en 31. maí.
- f) Hjúkrunarfræðideild er heimilt að fella niður áður auglýst diplomanám náist ekki lágmarksþátttaka til að tryggja fjármögnun þess.

#### 4. gr.

##### *Inntökuskilyrði.*

Til að innritast í diplomanám við hjúkrunarfræðideild þarf stúdent að hafa lokið B.S.-prófi í hjúkrunarfræði eða öðru samsvarandi prófi og vera handhafi hjúkrunarleyfis á Íslandi. Miðað er við að nemandi hafi að lágmarki 6,5 í aðaleinkunn á B.S.-prófi eða samsvarandi

námi. Jafnframt þarf nemandi að búa yfir góðri enskukunnáttu. Heimilt er að gera forkröfu um að umsækjandi hafi allt að tveggja ára starfsreynslu í hjúkrun.

Hjúkrunarfræðideild er heimilt að víkja frá reglunni um B.S.-próf hafi umsækjandi aflað sér sérstakra starfsréttinda eða lokið ákveðnu formlegu námi á því sviði, sem tilgreint er í auglýsingu um viðkomandi diplomanám. Við inntöku er tekið mið af: a) einkunnum, b) starfsreynslu, c) einstaklingsviðtölum og d) ummælum vinnuveitenda.

#### 5. gr.

##### *Einingafjöldi og tímalengd náms.*

Diplomanám í hjúkrunarfræði er 20 einingar en diplomanám með starfsþjálfun er 30 einingar. Miðað er við að í eðlilegri námsframvindu sé lengd diplománámsins (20e) eitt námsár en að starfsþjálfun (10e) fari fram að loknum þeim námsþætti. Þá skal náminu í heild vera lokið innan þriggja ára. Heimilt er að skipuleggja nám með auglýstri námskrá sem nær yfir allt að þrjú ár þegar um er að ræða diplomanám án starfsþjálfunar. Námshraði nemenda skal vera í samræmi við auglýsta námskrá og framboð námskeiða.

#### 6. gr.

##### *Samsetning náms.*

Námskrá skal að jafnaði skipulögð þannig að hægt sé að taka námið sem hluta af formlegu meistaranámi eða sem stakt nám sem lýkur með diplomaviðurkenningu. Samsetning námskrár diplománáms skal vera kjarni með námskeiðum á samvöldum sérsviðum til a.m.k. 10 eininga og námskeið á sérsviði diplománámsins til 7-10 eininga, skv. nánari útfærslu í liðum a, b og c hér á eftir. Námskrá skal á hverjum tíma vinna í náinni samvinnu við fagdeildir Félags íslenskra hjúkrunarfræðinga, sérfræðinga og/eða stofnanir á viðkomandi sérsviði. Lögð er áhersla á að allt diplomanám geti orðið áfangi í námi til meistaraþrófs.

Hjúkrunarfræðingur sem lokið hefur diplomanámi að viðbættri starfsþjálfun (30e) á að standast alþjóðlegar viðmiðanir til starfsréttinda á því sérsviði.

Að öðru leyti miðar samsetning námsins að því að nemandi hafi að því loknu öðlast góða starfsleikni, fagþekkingu og tileinkað sér fagleg viðhorf á tilteknu starfs/fræðasviði hjúkrunar. Ennfremur miðast hún við að nemandi:

- hafi kynnt sér helstu hugmyndastefnur, rannsóknir, aðferðir og kenningar á sérsviði sínu og geti tengt þær þekkingu, eigin reynslu og starfi,
- geti starfað við hjúkrun á viðkomandi sérsviði,
- geti haft umsjón með almennum þróunarverkefnum á sínu sérsviði í samvinnu við hjúkrunarsérfræðinga,
- geti tekið þátt í agaðri faglegri umræðu um sérsviðið,
- geti metið fagleg gæði almennra verkefna á sérsviði sínu,
- geti nýtt sér rannsóknaniðurstöður með markvissum og gagnrýnum hætti við gagnöflun og úrlausn faglegra mála og
- geti beitt sér fyrir umbótum og nýjungum á sérsviðinu.

##### *a. Almennur kjarni á samvöldum sérsviðum (10-13e).*

Námskeið til a.m.k. 10 eininga mynda kjarna fyrir samvalin sérsvið. Skilgreina skal í hverri námskrá hvaða námskeið geta myndað kjarna fyrir viðkomandi diplomanám. Leitast skal við að skipuleggja námskeið í slíka kjarna þannig að þau nýtist fleiri sérsviðum. Tillögur að samsetningu slíks almenns kjarna í námskrá diplománámsins verði hverju sinni unnar af rannsóknanámsnefnd í samvinnu við viðkomandi fræðasvið deildarinnar, fagdeildir innan Félags íslenskra hjúkrunarfræðinga, erlendar fagdeildir ef við á og sérfræðinga á sérsviðum.

Öll námskeið í almennum kjarna diplomanáms skulu vera opin öllum hjúkrunarfræðingum líkt og önnur meistaranámskeið.

*b. Námskeið á sérsviði diplomanáms (7-10e).*

Í námskrá hvers diplomanáms skal skipuleggja námskeið sem telja samtals 7-10 einingar og veita þekkingu á viðkomandi sérsviði. Tillögur að samsetningu slíkra námskeiða verði hverju sinni unnar af rannsóknánámsnefnd í samvinnu við viðkomandi fræðasvið deildarinnar, fagdeildir Félags íslenskra hjúkrunarfræðinga, erlendar fagdeildir ef við á og sérfræðinga á sérsviðum. Unnt er að takmarka fjölda stúdenta, sbr. c-lið 3. gr. og 4. gr. Námskeið á sérsviði eru að jafnaði kennd með reglulegu millibili og mun liggja fyrir áætlun um tímaröðun þeirra.

*c. Klínísk starfsþjálfun til diplomanáms á sérsviði (10e).*

Hjúkrunarfræðideild getur ákveðið að bjóða upp á sérhæfða starfsþjálfun til 30 eininga diplomanáms. Starfsþjálfunin telur þá 10 einingar á sérsviðinu og veitir þjálfun í klínískum vinnubrögðum og vinnuferlum. Starfsþjálfunin fer fram í námsráðningu á vettvangi sérsviðsins skv. viðmiðum (handbók). Tillögur að samsetningu og framkvæmd slíkrar starfsþjálfunar verði hverju sinni unnar af umsjónarráði viðkomandi diplomanáms í samvinnu við rannsóknánámsnefnd, viðkomandi fagdeildir Félags íslenskra hjúkrunarfræðinga, erlendar fagdeildir ef við á og fagfulltrúa þeirra stofnana sem starfsþjálfunin á að fara fram við. Ráðnir verða umsjónarkennarar starfsþjálfunar í samráði við umsjónarráð. Hjúkrunarfræðideild veitir sérstakt prófskríteini, diploma, til staðfestingar því að viðkomandi hafi staðist tilskildar kröfur.

7. gr.

*Námskeið í diplomanámi sem hluti af meistaranámi.*

Nemendur geta fengið allt að 20 einingar metnar úr diplomanámi inn í nám til meistaraþrófs og jafnframt tekið námið samhliða formlegu meistaranámi. Einingar úr klínískri starfsþjálfun eru ekki metnar inn í nám til meistaraþrófs. Miðað er við að lágmarkseinkunn í einstökum námskeiðum í diplomanámi sé 6,0 og að meðaleinkunn í diplomanámi sé 7,25 til að það sé metið inn í meistaranám.

8. gr.

*Umsjónarráð diplomanáms.*

Þegar deildin hefur samþykkt diplománám á ákveðnu sérsviði skipar deildarráð sérstakt umsjónarráð diplomanámsins sem í eru forstöðumaður eða forstöðumenn viðkomandi fræðasviðs eða fræðasviða, ásamt tveimur öðrum sérfræðingum á sviðinu eða sviðunum.

9. gr.

*Kröfur til umsjónarkennara námskeiða og kennara í diplomanámi á meistarástigi.*

Umsjónarkennari skal að jafnaði vera fastráðinn kennari (lektor, dósent eða prófessor) í viðkomandi grein. Ef umsjónarkennari er ekki fastráðinn kennari eða sérfræðingur við deildina skal hann a.m.k. hafa lokið meistaraþrófi, vera sérfræðingur á sérsviði námskeiðsins eða tengdu sviði og auk þess hafa starfað við það um árabíl og stundað rannsóknir því tengdar. Umsjónarráð hvers diplomanáms tilnefnir umsjónarkennara hvers námskeiðs í námskránni, yfirfer námskeiðalýsingu og mælir með henni við rannsóknánámsnefnd til staðfestingar. Rannsóknánámsnefnd getur óskað eftir umsögn og samráði við fleiri umsjónarráð en eitt um tiltekið námskeið, sbr. a-lið 6. greinar. Kennarar í námskeiðum skulu að jafnaði hafa lokið meistaraþrófi.

## 10. gr.

*Prófdómarar.*

Prófdómarar eru skipaðir samkvæmt almennum reglum þar um og ætíð skal skipa prófdómara fyrir nemendur sem ljúka diplomanámi til 30 eininga á sérsviði. Rektor skipar prófdómara eftir tilnefningu frá viðkomandi umsjónarráði.

## 11. gr.

*Námsmat.*

Námskeið í diplomanámi skulu vera á meistarastigi og standast kröfur þar um. Diplománámi lýkur með prófskírteini, sem staðfestir að nemandi hafi lokið diplomanámi á viðkomandi sviði og reiknast meðaleinkunn nemandans vera vegið meðaltal eininga úr þeim námskeiðum sem nám hans samanstendur af. Lágmarkseinkunn í námskeiðum í diplomanámi skal vera 6,0.

Sérstakt mat á námsárangri nemanda fer fram þegar um diplomanám til 30 eininga á sérsviði er að ræða. Skipaður er prófdómari sem ásamt umsjónarkennara starfsþjálfunar prófar nemandann skv. viðmiðum sem samþykkt hafa verið af umsjónarráði.

## 12. gr.

*Tengsl við aðra háskóla.*

Hægt er að skipuleggja hluta diplomanámsins (5-10e) í samvinnu við erlendan háskóla og/eða heilbrigðisstofnun.

## 13. gr.

*Prófskírteini - diploma.*

Er nemandi hefur staðist námskröfur sem tilgreindar eru í námskrá fyrir diplomanám (m.a. staðist próf að lokinni sérhæfðri starfsþjálfun, sé kveðið á um það) telst hann hafa lokið diplomanámi á sérsviði. Veitt er sérstakt prófskírteini, diploma, þessu til staðfestingar.

## 14. gr.

*Gildistaka o.fl.*

Reglur þessar sem samþykktar hafa verið af deildarfundum í hjúkrunarfræðideild og hlotið staðfestingu háskólaráðs, sbr. 2. mgr. 13. gr. laga nr. 41/1999, um Háskóla Íslands og 67. og 68. gr. reglna nr. 458/2000, fyrir Háskóla Íslands, öðlast þegar gildi.

Auk birtingar í B-deild Stjórnartíðinda, sbr. 1. mgr. 20. gr. laga nr. 41/1999, skal birta reglur þessar í kafla hjúkrunarfræðideildar í kennsluskra og á heimasíðu deildarinnar.

*Háskóla Íslands, 21. febrúar 2003.*

**Páll Skúlason.**

*Halldór Jónsson.*